

**ETIČKI KODEKS
ZASTUPNIKA U PREDSTAVNIČKOM DOMU PARLAMENTA FEDERACIJE
BOSNE I HERCEGOVINE**

Na osnovu člana 263. stava 1. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br.: 69/07, 2/08 i 26/20) Predstavnički dom Parlamenta Federacije Bosne i Hercegovine je na sjednici održanoj 06.06.2022.godine donio

ETIČKI KODEKS ZASTUPNIKA U PREDSTAVNIČKOM DOMU PARLAMENTA FEDERACIJE BOSNE I HERCEGOVINE

1. OPĆE ODREDBE

Član 1.

Etički kodeks zastupnika u Predstavničkom domu Parlamenta Federacije Bosne i Hercegovine (u daljnjem tekstu: Kodeks) utvrđuje obaveze zastupnika u skladu sa zakonom i Poslovníkom o radu Predstavničkog doma Parlamenta Federacije Bosne i Hercegovine (u daljnjem tekstu: Poslovník), jačanje povjerenja između zastupnika i građana, povećanje nivoa povjerenja građana u državne institucije, moralno i odgovorno vršenje mandata izabranog zastupnika u cilju razvoja parlamentarne demokratije i osiguranja javnosti rada Predstavničkog doma Parlamenta Federacije Bosne i Hercegovine (u daljnjem tekstu: Predstavnički dom).

Član 2.

(Rodne odrednice)

Izrazi koji se u ovom Kodeksu koriste za fizička lica u muškom rodu podrazumijevaju iste izraze u ženskom rodu.

Član 3.

(Predmet Kodeksa)

(1) Predmet Kodeksa je preciziranje i uspostava standarda ponašanja zastupnika, koje građani očekuju u obavljanju njihovih javnih dužnosti, a što će se odražavati na očekivanu visoku radnu etiku, dignitet Parlamenta i zastupnika, te povjerenje građana prema državnim institucijama, obaveze zastupnika u radu Predstavničkog doma, kazne i ođbitke zastupnicima za kršenje kodeksa, ovlaštenja rukovodstvu Predstavničkog doma za uspostavljanje reda i mira na sjednicama Predstavničkog doma.

(2) Sve osobe na koje se odnosi Kodeks dužne su ga se pridržavati u obavljanju svojih dužnosti vezanih uz rad u Predstavničkom domu Parlamenta Federacije Bosne i Hercegovine.

Član 4.
(Definicija javnog prostora)

(1) Pod javnim prostorom u smislu ovog kodeksa osim službenih prostorija Predstavničkog doma smatraju se i svi drugi prostori u kojima se održavaju aktivnosti i događaji koje organizira Predstavnički dom.

(2) Javnim prostorom smatraju se aktivnosti zastupnika u svim vrstama medija kao i na društvenim mrežama i drugim kanalima internet komunikacije na kojima je moguće utvrditi identitet zastupnika.

Član 5.
(Druge osobe na koje se odnosi ovaj Kodeks)

Ovaj Kodeks se odnosi i na sve osobe koje prisustvuju sjednicama Predstavničkog doma i radnim tijelima Predstavničkog doma i dužne su ga poštovati.

2. OSNOVNI PRINCIPI PONAŠANJA

Član 6.
(Primat zakona)

Zastupnik pored poštivanja Ustava, zakona i Poslovnika, dužan je da se pridržava i Kodeksa.

Član 7.
(Opći interes)

(1) U vršenju svoje funkcije zastupnik će služiti isključivo općem interesu, a ne svom direktnom ili indirektnom osobnom interesu ili privatnom interesu pojedinca ili grupe pojedinaca sa ciljem postizanja direktne ili indirektno osobne koristi.

(2) Ovim Kodeksom se utvrđuje javni interes putem kojeg građani imaju pravo da očekuju od zastupnika ponašanje u skladu sa ovim kodeksom, te da se mogu poduzimati mjere koje će osigurati takvo ponašanje ili sankcionirati ponašanje suprotno Kodeksu.

Član 8.
(Neposredni kontakt sa građanima)

(1) Zastupnik ostvaruje stalni i neposredni kontakt sa građanima u zastupničkim kancelarijama, na tribinama i drugim javnim skupovima, kao i odgovaranjem na pitanja građana koja su upućena poštom i elektronskim putem.

(2) Zastupnik održava sastanke sa predstavnicima nevladinih organizacija, udruženja građana i drugih interesnih grupa i nastoji da inicijative, sugestije i prijedloge koje dobije od građana afirmiše pred nadležnim radnim tijelima Predstavničkog doma.

Član 9. (Korištenje informacija)

(1) Zastupnik ne smije da koristi informacije do kojih je došao u obavljanju zastupničke funkcije, a koje bi mogle da budu upotrebljene radi sticanja finansijske ili neke druge koristi za sebe ili drugog, niti da time drugog dovede u neravnopravan položaj.

(2) Zastupnik u obavljanju zastupničke funkcije poštuje prava i ovlaštenja drugih funkcionera i zaposlenih u državnim organima.

Član 10. (Odgovornost)

(1) Zastupnik će vršiti povjerenu funkciju savjesno i odgovorno uz naglašenu otvorenost i spremnost da odgovara za odluke koje donosi Predstavnički dom, kao i za osobno djelovanje i ponašanje te spremnost da se izloži svakom nadzoru koji je u skladu sa zakonom i funkcijom koju vrši.

(2) Sve osobe na koje se odnosi ovaj Kodeks imaju odgovornost za njegovo poštivanje te mogu snositi sankcije za njegovo kršenje a koje izriču nadležna tijela i dužnosnici u skladu sa ovim kodeksom.

Član 11. (Ograničenja u vršenju funkcije)

U vršenju povjerenih funkcija zastupnik će poštovati prava i ovlaštenja svih ostalih zastupnika i suzdržavati se od podsticanja ili pomaganja u izvršavanju povjerenih funkcija na način da sebe ili ostale zastupnike dovede u privilegovan položaj protivno odredbama zakona koji reguliraju sukob interesa.

Član 12. (Otvorenost i odnosi sa medijima)

(1) Zastupnici su otvoreni prema javnosti kada su u pitanju odluke koje donose i rad koji obavljaju, blagovremeno će obavještavati javnost putem sredstava javnog informiranja i nijednom svojom aktivnošću neće izbjegavati da jasno i javno saopšte svoje stavove i razloge za sopstvene odluke i ponašanja. Prema zahtjevima medija i građana u potpunosti će pružati informacije vezane uz vršenje svojih dužnosti. Povjerljive informacije koje dobijaju prilikom vršenja svojih parlamentarnih dužnosti zastupnici treba da koriste samo u vezi s tim dužnostima, a nikako s ciljem sticanja finansijske ili druge koristi za sebe osobno, niti za druge. Zastupnici treba da budu spremni objasniti razloge zbog kojih su donijeli određene odluke i ograničiti informacije samo kada to zakon i drugi propisi određuju.

- (2) Zastupnik će nastojati da osigura javnost svog rada. Zastupnik će odgovarati na zahtjeve medija i šire javnosti za davanje informacija u vezi s obavljanjem zastupničke funkcije.
- (3) Zastupnik podstiče i ohrabruje svaku mjeru koja ima za cilj unapređenje medijskog praćenja njegovih aktivnosti u obavljanju zastupničke funkcije i funkcioniranja Predstavničkog doma.

Član 13.

(Zabrana nepovoljnog postupanja prema prijaviteljima)

Zabranjena je svaka vrsta nepovoljnog postupanja prema osobama koje su u dobroj vjeri prijavile ili namjeravaju prijaviti povredu etičkog kodeksa ili na bilo koji način učestvovala u postupku za utvrđivanje povrede kodeksa, pružile ili imale namjeru ponuditi informacije ili dokumente potrebne u postupku utvrđivanja povrede kodeksa ili o povredi kodeksa informirale javnost.

3. POSEBNE OBAVEZE

Član 14.

(Kultura ponašanja na sjednicama, sastancima i događajima)

- (1) Zastupnik se mora ponašati u skladu sa poslovnicima tijela u čijem radu učestvuje tokom obavljanja svoje javne funkcije.
- (2) Zastupnici pri iznošenju različitih pogleda i stavova trebaju se koristiti istinom i argumentima, njegujući kulturu dijaloga, gradeći na takav način vlastiti dignitet, a i dignitet institucija u okviru kojih djeluju.
- (3) Zastupnik je dužan prisustvovati sjednicama Predstavničkog doma, radnih tijela Predstavničkog doma, sastancima i događajima na koje je delegiran u ime Predstavničkog doma.
- (4) Zastupnik je dužan prisustvovati cijelom toku sjednica Predstavničkog doma i radnih tijela te svojim izlaskom ili napuštanjem sjednice ne smije ugroziti kvorum za održavanje sjednice.
- (5) Zastupnik će u svojim javnim istupima, bilo da se radi o istupima za govornicom u Predstavničkom domu, ili o izjavama za pisane i elektronske medije, voditi računa da ničim ne ugrozi kako vlastiti dignitet, tako i dignitet Predstavničkog doma, odnosno Parlamenta Federacije Bosne i Hercegovine, rukovodeći se normama i standardima civilizovanog ponašanja, te pažljivo birajući vokabular koji u tim prilikama koristi.
- (6) Zastupnik će također paziti da u svojim istupima ne ugrožava ugled i dignitet ostalih zastupnika, te svih drugih izabраних званиčnika – vršilaca zakonodavnih i izvršnih funkcija na svim nivoima vlasti, na koje se eventualno poziva u svojim istupima.
- (7) Također, pri vršenju svoje funkcije na sjednicama i javnim sastancima i događajima zastupnik neće vrijeđati svoje sagovornike, koristiti mobitel za razgovor, upadati u riječ govornicima i činiti ostale radnje kojima se ometa tok sjednice.
- (8) Zastupnik ne smije svojim kretanjem ometati rad drugih zastupnika i Predstavničkog doma.
- (9) Zastupnik ne smije narušavati mir sjednice drskim ponašanjem, vrijeđanjem drugog lica ili drugim bezobzirnim ponašanjem ugrožavati sigurnost drugih lica ili izazivati osjećaj fizičke ugroženosti.
- (10) Zastupnik ne smije na sjednici isticati simbole, banere i zastave osim na odjevnim predmetima zastupnika koji će biti u skladu sa ovim Kodeksom.

(11) Zastupnik ne smije da narušava red i mir stvaranjem nepotrebne buke izvođenjem ili reprodukcijom muzičkih i drugih sadržaja, korištenjem muzičkih instrumenata, radio i televizijskih prijemnika i drugih zvučnih uređaja, kao i radom motornog vozila, prijevozom, utovarom, istovarom, upotrebom sirene, rukovanjem predmetima ili na drugi način.

(12) Zastupnik ne smije narušavati red i mir učestvovanjem u tuči, fizičkim napadom ili zlostavljanjem drugog ili izazvati tuču, odnosno zlostavljanjem ili fizičkim napadom na drugog.

(13) Zastupnik ne smije unositi oružje na sjednice.

(14) Zastupnici su dužni obavljati svoju dužnost bez pristranosti, predrasuda, stereotipa i diskriminacije. Diskriminacija u smislu ovog Kodeksa je zabranjena u svim svojim pojavnim oblicima uključujući i direktnu i indirektnu diskriminaciju, uznemiravanje po bilo kojem zabranjenom osnovu, seksualno uznemiravanje, mobing, segregaciju, izdavanje naloga za diskriminaciju ili poticanje na diskriminaciju i viktimizaciju.

(15) Tokom održavanja sjednica, u prostorijama gdje se održava sjednica Predstavničkog doma ili radnih tijela, te tokom online zasjedanja, zastupnicima i gostima na njihovoj odjeći ili okruženju nije dozvoljeno isticanje stranačkih, političkih i drugih obilježja, slogana i sličnih vizuelnih ili zvučnih sadržaja propagandne ili slične prirode, izuzev obilježja manjih od 1 cm (poput značke i slično) i osim državnih obilježja zastave i grba.

(16) Zastupnik je obavezan na sjednice Predstavničkog doma i sjednice radnih tijela dolaziti adekvatno obučen, čuvajući na taj način dignitet Predstavničkog doma. Adekvatna odjeća zastupnika podrazumijeva uredno odijelo, košulju, kravatu i slično za muškarce, a odijelo, kostim, košulju i slično za žene.

(17) Zastupnik ne smije koristiti službena sredstva ili imovinu Predstavničkog doma za potrebe izborne kampanje.

(18) Zastupnik ne smije namjerno ili iz krajnje nepažnje nanositi materijalnu štetu Parlamentu Federacije Bosne i Hercegovine ili podsticati druge da to čine.

(19) Zastupnik je dužan da poštuje vrijeme za diskusiju propisano Poslovníkom.

(20) Predsjedavajući Predstavničkog doma i predsjednik radnih tijela ne smije neopravdano udaljiti zastupnika sa sjednice doma ili radnog tijela.

Član 15. **(Prisustvo)**

(1) Zastupnik je dužan prisustvovati svim sjednicama Predstavničkog doma i radnih tijela u kojima participira.

(2) U slučaju spriječenosti iz opravdanih (zdravstvenih ili sličnih razloga) dužan je odsustvo najaviti najmanje 12 sati prije održavanja sjednice Predstavničkog doma ili radnog tijela, te poslati relevantan pisani dokaz/opravljanje o razlozima odsustva najkasnije 48 sati nakon okončanja sjednice Doma ili radnog tijela.

(3) U slučaju nenajavljenog i/ili neopravdanog odsustva sa sjednice Doma ili radnog tijela, zastupniku neće biti isplaćen dio paušala za mjesec u kojem nije prisustvovao sjednici, što utvrđuje Administrativna komisija, u skladu sa članom 29. Kodeksa.

(4) U slučaju nenajavljenog i/ili neopravdanog napuštanja sjednice Predstavničkog doma ili radnog tijela prije njenog okončanja, zastupniku neće biti isplaćen dio paušala za mjesec u kojem je napustio sjednicu, što utvrđuje Administrativna komisija, u skladu sa članom 29. Kodeksa.

(5) U slučaju tri uzastopna nenajavljena i/ili neopravdana odsustva sa sjednice Predstavničkog doma ili radnog tijela ili napuštanja zasjedanja, zastupniku neće biti isplaćen dio paušala za narednih šest mjeseci počevši od mjeseca u kojem je zabilježeno treće uzastopno odsustvo, što utvrđuje Administrativna komisija, a u skladu sa članom 29. Kodeksa.

Član 16.

(Uznemiravanje na osnovu spola i seksualno uznemiravanje)

(1) Uznemiravanje je svako neželjeno ponašanje na osnovu spola kojim se želi povrijediti dostojanstvo osobe ili grupe osoba i stvoriti zastrašujuće, neprijateljsko, degradirajuće, ponižavajuće ili uvredljivo okruženje ili kojim se postiže takav učinak.

(2) Seksualno uznemiravanje je svaki neželjeni oblik verbalnog, neverbalnog ili fizičkog ponašanja spolne prirode kojim se želi povrijediti dostojanstvo osobe ili grupe osoba, ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.

(3) Neželjeni oblici verbalnog ponašanja iz stava (1) uključuju između ostalog:

- a) upućivanje verbalnih i fizičkih prijedloga seksualne naravi drugoj osobi;
- b) zahtijevanje neželjenog fizičkog kontakta;
- c) iznošenje šala ili aluzija koje su spolne prirode, uključujući opaske u vezi sa spolom i seksualnom orijentacijom;
- d) izrugivanje i ismijavanje na spolnoj osnovi;
- e) pisanje seksualno eksplicitnih ili sugestivnih poruka ili pisama;
- f) prijetnje upućene osobi koja odbija udovoljiti seksualnim ponudama.

(4) Neželjeni oblici neverbalnog ponašanja iz stava (1) uključuju između ostalog:

- a) gestikulacije, znakovi i insinacije koje upućuju na imitaciju spolnog odnosa;
- b) izlaganje druge osobe bilo kojem materijalu eksplicitnog, uvredljivog ili uznemirujućeg sadržaja.


(5) Neželjeni oblici fizičkog ponašanja iz stava (1) uključuju između ostalog:

- a) neželjeni fizički kontakti, te dodiri seksualne naravi;
- b) neželjena invazija osobnog prostora;
- c) fizički nasrtaji i napadi.

Član 17.

(Nesebičnost)

Svojim ukupnim radom i kao zastupika i kao javne ličnosti, zastupnik će nastojati da poboljša rad Predstavničkog doma i afirmira rad radnih tijela Predstavničkog doma. U tom cilju stavit će na raspolaganje svoje stručno znanje, iskustvo i radni potencijal.



Član 18.
(Tolerantnost i spremnost na kompromise)

Zastupnik će svoje dužnosti obavljati odgovorno i ostvarivati ciljeve iz programa rada Predstavničkog doma bez isključive pristrasnosti prema stranačkoj pripadnosti, rasi, vjeroispovijesti, naciji, spolu i slično.

Član 19.
(Sukob interesa)

(1) Zastupnik će se u vršenju funkcije pridržavati odredaba Zakona o sukobu interesa i drugih zakona koji uređuju nespojivost funkcija zastupnika. U svim slučajevima nastupanja sukoba interesa ili nespojivosti funkcija, zastupnik će u najkraćem roku prijaviti takav slučaj i odstupiti sa pozicije ako to zakon ili drugi propis nalaže.

(2) Zastupnik je dužan izuzeti se iz odlučivanja o aktima koji se direktno vežu uz njegov privatni interes, osim u situacijama izbora i imenovanja i donošenja zakona i drugih akata koji se ne odnose na pojedinca.

(3) Zastupnik je dužan izuzeti se iz odlučivanja o izvještajima privrednih društava, ustanova i institucija u kojima ostvaruje radni odnos ili je u skladu sa Zakonom o radu privremeno prekinuo radni odnos radi obavljanja dužnosti zastupnika u Predstavničkom domu.

Član 20.
(Upravljanje resursima)

Zastupnik će javnim resursima upravljati na efektivan, efikasan i ekonomičan način; upravljati imovinom Federacije Bosne i Hercegovine u skladu sa propisima i općim interesom; neće podsticati na donošenje nepravilnih odluka koje bi mogle donijeti osobnu korist ili ostvarenje nečijeg privatnog interesa; uzdržavat će se od svih aktivnosti koje bi trebale rezultirati izborom, imenovanjem ili postavljenjem osoba na određene pozicije, a da se pri tome ne primjenjuju zakoni i drugi propisi; osigurati poštivanje principa kvaliteta, profesionalnosti, znanja i sposobnosti. Navedene obaveze se odnose na sva imenovanja o kojima odlučuje Predstavnički dom i radna tijela Predstavničkog doma.

Član 21.
(Pridržavanje budžetske i finansijske discipline)

(1) Zastupnik će se pridržavati budžetske i finansijske discipline koja osigurava ispravno upravljanje javnim prihodima na način reguliran važećim zakonodavstvom.

(2) U vršenju svojih dužnosti zastupnik neće učiniti ništa čime bi pronevjerio budžetska sredstva ili donacije. Zastupnik neće poduzimati ništa što bi moglo dovesti do toga da se budžetska sredstva ili donacije koriste direktno ili indirektno u osobne svrhe.

4. PRIMJENA I POŠTIVANJE KODEKSA

Član 22. (Primjena Kodeksa)

- (1) Kodeks se odnosi na zastupnike u Predstavničkom domu, definirano u skladu sa članom 1. Kodeksa, a u okviru vršenja zastupničke funkcije.
- (2) Kodeks se odnosi i na sve osobe koje prisustvuju sjednicama Predstavničkog doma, radnih tijela i drugih događaja u organizaciji Predstavničkog doma.

Član 23. (Tijelo za praćenje primjene Kodeksa)

- (1) Praćenje rada, nadzor nad ponašanjem zastupnika i rješavanje prijava u vezi s kršenjem odredbi Kodeksa vršit će Etička komisija, imenovana od Predstavničkog doma.
- (2) Broj članova Komisije utvrđuje se Poslovníkom te su u njoj zastupljeni zastupnici iz različitih političkih stranaka.
- (3) Zastupnik se može žaliti na mjere koje je predložila Etička komisija.

Član 24. (Prijava kršenja Kodeksa ponašanja)

- (1) Pravo podnošenja prijave imaju zastupnici u Predstavničkom domu za sve oblike kršenja odredbi Kodeksa.
- (2) Zastupnik ima pravo podnositi prijave za sve oblike kršenja odredbi Kodeksa. Prijava potpisana od zastupnika podnosi se u pisanom obliku Etičkoj komisiji, najkasnije u roku 15 dana od momenta kršenja Kodeksa. U prijavi se obavezno navode radnje za koje se smatra da čine povredu Kodeksa, odnosno član Kodeksa koji je prekršen i dokazi koji to potvrđuju. Etička komisija razmatra prijavu i provodi postupak ispitivanja osnovanosti prijave najkasnije u roku 30 dana od dana podnošenja prijave i nakon toga odlučuje da li postoji povreda odredbi Kodeksa.
- (3) Ako Etička komisija utvrdi da je bilo povreda odredbi Kodeksa, o tome će obavijestiti podnosioca prijave, osobu koja je počinila povredu, predsjedavajućeg Predstavničkog doma i sekretara Predstavničkog doma.
- (4) Ako Etička komisija ocijeni da je zastupnik počinio povredu neke od odredbi Kodeksa, Etička komisija će donijeti odluku o izricanju mjere u skladu sa Kodeksom i Pravilnikom o radu Etičke komisije i o tome obavijestiti predsjedavajućeg i sekretara Predstavničkog doma.

Član 25. (Mjere za kršenje Kodeksa ponašanja)

Mjere za povredu odredaba Kodeksa su:

- a) ukor,
- b) javni ukor,
- c) udaljavanje sa sjednice, sastanka ili događaja u organizaciji Predstavničkog doma,

- d) obustava isplate paušala,
- e) obustava isplate dijela plaće,
- f) novčana kazna.

Član 26.
(Mjera ukora)

- (1) Mjera ukora izvršava se saopštenjem predsjedavajućeg Predstavničkog doma o izrečenoj mjeri i dostavom primjerka odluke zastupniku kome je mjera izrečena.
- (2) Mjeru ukora donosi Etička komisija nakon prijave i provedenog postupka.

Član 27.
(Mjera javnog ukora)

- (1) Mjera javnog ukora izvršava se objavljivanjem odluke o javnom ukoru u „Službenim novinama Federacije BiH“, na web stranici i zvaničnim kanalima na društvenim mrežama Predstavničkog doma i u medijima.
- (2) Mjeru javnog ukora donosi Etička komisija nakon prijave i provedenog postupka.

Član 28.
(Mjera udaljavanja sa sjednice, sastanka ili događaja)

- (1) Mjera udaljavanja se može izreći zastupniku ili bilo kojoj drugoj osobi koja prisustvuje sjednici Predstavničkog doma, radnog tijela, sastanku ili drugom događaju u organizaciji Predstavničkog doma.
- (2) Mjera udaljavanja sa sjednice se može donijeti samo u slučaju krajnje nužde kada zastupnik ili bilo koja druga osoba kontinuirano krši odredbe Kodeksa i onemogućava nesmetan rad Predstavničkog doma, radnog tijela, javnog sastanka ili događaja u organizaciji Predstavničkog doma.
- (3) Mjeru udaljavanja sa sjednice donosi predsjedavajući Predstavničkog doma za sjednice doma, odnosno predsjednik radnog tijela na sjednicama radnih tijela.
- (4) Opravdanost svakog udaljavanja sa sjednice Predstavničkog doma, radnog tijela, sastanka ili događaja će biti predmet preispitivanja Etičke komisije na prvoj narednoj sjednici po službenoj dužnosti, koja će donijeti zaključak o opravdanosti udaljavanja sa sjednice, eventualnim drugim sankcijama i o tome informirati Predstavnički dom.
- (5) Ukoliko Etička komisija ne potvrdi opravdanost udaljavanja sa sjednice Predstavničkog doma ili radnog tijela, smatrat će se da je predsjedavajući Predstavničkog doma ili predsjednik radnog tijela prekršio ovaj Kodeks i Etička komisija će po službenoj dužnosti provesti postupak za kršenje Kodeksa.
- (6) Asistenciju prilikom provođenja ove mjere predsjedavajućem ili predsjedniku radnog tijela pružaju namještenici i državni službenici Službe za zajedničke poslove institucija Federacije Bosne i Hercegovine.

Član 29.

(Mjera obustave isplate dijela plaće)

- (1) Mjera obustave isplate dijela plaće se može donijeti ukoliko zastupnik ne prisustvuje sjednici Predstavničkog doma, sjednici radnog tijela u koje je izabran, svojim odlaskom ugrozi kvorum održavanja sjednice Predstavničkog doma ili radnog tijela.
- (2) Ukoliko zastupnik ne prisustvuje sjednici Predstavničkog doma, radnog tijela ili svojim odlaskom ugrozi kvorum za održavanje sjednice Predstavničkog doma ili radnog tijela smatrat će se da taj dan nije prisustvovao poslu i u skladu sa Zakonom o radu za taj radni dan neće biti obračunata plaća i druge naknade vezane uz rad.
- (3) Sekretar Predstavničkog doma i državni službenici zaduženi za praćenje rada radnih tijela dužni su Etičkoj komisiji u roku 72 sata dostaviti informaciju o svim zastupnicima koji nisu prisustvovali sjednici Predstavničkog doma ili sjednici radnog tijela u koje je izabran.
- (4) Sekretar Predstavničkog doma nadležan je za provođenje ove mjere, te jednom mjesečno dostavlja izvještaj Etičkoj komisiji o provedenim mjerama koji razmatra Etička komisija.
- (5) U slučaju bolesti zastupnik je dužan da pisano obavijesti sekretara Predstavničkog doma nakon čega će se provoditi procedura u skladu sa Zakonom o radu Federacije Bosne i Hercegovine u slučaju bolesti.

Član 30.

(Mjera obustave isplate dijela paušala)

- (1) Mjera obustave isplate dijela paušala se može donijeti ukoliko zastupnik ne prisustvuje sjednici Predstavničkog doma, sjednici radnog tijela u koje je izabran, svojim odlaskom ugrozi kvorum održavanja sjednice Predstavničkog doma ili radnog tijela.
- (2) Ukoliko zastupnik ne prisustvuje sjednici Predstavničkog doma, radnog tijela ili svojim odlaskom ugrozi kvorum za održavanje sjednice Predstavničkog doma ili radnog tijela Etička komisija će donijeti odluku i uputiti zahtjev Administrativnoj komisiji da se zastupniku umanji paušal za 99%.
- (3) Sekretar Predstavničkog doma i državni službenici zaduženi za praćenje rada radnih tijela dužni su Etičkoj komisiji u roku 72 sata dostaviti informaciju i prijavu protiv svih zastupnika koji nisu prisustvovali sjednici Predstavničkog doma ili sjednici radnog tijela u koje je izabran.
- (4) U slučaju tri uzastopna nenajavljena i/ili neopravdana izostanka sa sjednice Predstavničkog doma ili radnog tijela ili napuštanja sjednice prije završetka, zastupniku neće biti isplaćeno 99% od pripadajućeg paušala narednih šest mjeseci počevši od mjeseca u kojem je zabilježeno treće uzastopno izostajanje.

Član 31.

(Mjera novčane kazne)

- (1) Etička komisija može zastupnicima i drugim osobama koje su prekršile odredbe ovog kodeksa izreći novčanu kaznu.

- (2) Visina novčane kazne, odnosno mjere odredit će se posebnim propisom u zavisnosti od težine povrede Kodeksa, te u skladu sa zakonskim propisima iz te oblasti.
- (3) Visina novčane kazne ne može biti manja od 100,00KM niti veća od 5.000,00 KM.

Član 32.
(Žalba na izrečenu mjeru)

- (1) Zastupnik kojem je izrečena mjera može uložiti žalbu.
- (2) Žalba na odluku Etičke komisije podnosi se predsjedavajućem i sekretaru Predstavničkog doma.
- (3) Rok za žalbu je najviše 15 dana od donošenja odluke Etičke komisije.
- (4) Predstavnički dom će imenovati „ad hoc“ komisiju koja će razmatrati žalbu i izvijestiti Predstavnički dom o svojoj odluci, najkasnije 15 dana od dana ulaganja žalbe.

Član 33.
(Evidencija izrečenih mjera)

O izrečenim mjerama kršenja Kodeksa vodi se evidencija u Stručnoj službi Predstavničkog doma.


5. PRIJELAZNE I ZAVRŠNE ODREDBE

Član 34.
(Promocija Kodeksa u javnosti)

Zastupnik će podržavati i podsticati sve aktivnosti usmjerene ka promociji Kodeksa u javnosti i medijima, a s ciljem unapređenja svijesti o principima sadržanim u Kodeksu.

Član 35.
(Prestanak važenja ranijeg Kodeksa)

Stupanjem na snagu ovog Kodeksa prestaje da važi raniji Etički kodeks ponašanja izabranih zastupnika u Predstavničkom domu donesen 28. juna 2008. godine na sjednici Predstavničkog doma.



Član 36.
(Stupanje na snagu)

Kodeks stupa na snagu danom donošenja i objavit će se u „Službenim novinama Federacije Bosne i Hercegovine“.

PF BIH
PREDSTAVNIČKI DOM
Broj 01-02-2231/21
Sarajevo, 06.06.2022.godine

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH



Mirsad Zahirović
Mirsad Zahirović